

VENDIM
Nr.781, datë 10.11.2011

PËR LICENCIMIN E SHKOLLËS SË LARTË UNIVERSITARE PRIVATE “INSTITUTI KANADEZ I TEKNOLOGJISË”, TIRANË

Në mbështetje të nenit 100 të Kushtetutës dhe të neneve 4, pika 2, 43, 44 e 45 të ligjit nr.9741, datë 21.5.2007 “Për arsimin e lartë në Republikën e Shqipërisë”, të ndryshuar, me propozimin e Ministrit të Arsimit dhe Shkencës, Këshilli i Ministrave

VENDOSI:

1. Licencimin e shkollës së lartë universitare private “Instituti Kanadez i Teknologjisë”, Tiranë, në emër të shoqërisë “T.A.L.M.-Albania”, sh.p.k., e cila do ta ushtrojë veprimtarinë në qytetin e Tiranës.

2. Shkolla e lartë universitare private “Instituti Kanadez i Teknologjisë”, Tiranë të organizohet në dy fakultete:

- a) Fakulteti i Ekonomisë, që ofron programet e studimit të ciklit të parë në:
 - i) Administrim biznesi;
 - ii) Administrim biznesi dhe teknologji informacioni.
- b) Fakulteti i Inxhinierisë, që do të ofrojë programet e studimit, të ciklit të parë, në:
 - i) Inxhinieri softuerike;
 - ii) Inxhinieri industriale.

3. Shkolla e lartë universitare private “Instituti Kanadez i Teknologjisë”, Tiranë, do të ofrojë programet e studimit të ciklit të parë, me kohëzgjatje 3 (tre) vite akademike dhe me realizimin e, së paku, 180 krediteve. Në përfundim të këtyre programeve të studimit lëshohet diplomë e nivelit të parë “Bachelor” në:

- a) Administrim biznesi;
- b) Administrim biznesi dhe teknologji informacioni;
- c) Inxhinieri softuerike;
- ç) Inxhinieri industriale.

4. Shkolla e lartë universitare private “Instituti Kanadez i Teknologjisë”, Tiranë, ta fillojë veprimtarinë mësimore për programet e studimit, të përcaktuara në pikën 3 të këtij vendimi, pasi të ketë marrë, jo më vonë se tri javë para fillimit të vitit akademik, lejen përkatëse nga Ministri i Arsimit dhe Shkencës. Ministri e lëshon lejen, pasi vlerëson se institucioni privat i arsimit të lartë ka përmbushur angazhimet e deklaruara, në përputhje me udhëzimin e tij për këtë qëllim.

5. Ndryshimet në vendndodhje, plane, forma studimi dhe programe, si dhe në elemente të tjera, të miratuara, bëhen pas miratimit nga Ministria e Arsimit dhe Shkencës.

6. Shkolla e lartë universitare private “Instituti Kanadez i Teknologjisë”, Tiranë, duhet t'i nënshtrohet procesit të akreditimit institucional dhe të programeve të studimit brenda afateve të përcaktuara në ligjin në fuqi.

7. Ngarkohet Ministria e Arsimit dhe Shkencës për kontrollin periodik të ligjshmërisë në institucion dhe për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTRI
Sali Berisha